

॥ नक्षत्र सूक्तम् ॥

तैत्तरीय ब्राह्मण, अष्टकम् ३, प्रश्नः १

तैत्तरीय संहिता, काण्डं ३, प्रपाठकः ५, अनु. १

ॐ ॥ अ॒ग्नि॒र्नः॑ पा॒तु कृ॒त्तिकाः॑ । नक्ष॒त्रं दे॒वमिन्द्रि॒यम् । इ॒दमा॑सां वि॒चक्ष॑णम् ।
ह॒वि॒रासं॑ जु॒होत॑न । यस्य॑ भा॒न्ति र॒श्मयो॑ यस्य॑ के॒तवः॑ । यस्ये॒मा वि॒श्वा भु॑व॒नानि॑ सर्वा॑
। स कृ॒त्तिका॑भि॒रभि सं॒वसानः॑ । अ॒ग्नि॒र्नो दे॒वः सु॒विते॑ द॒धातु॑ ॥ १ ॥

प्र॒जाप॑ते रो॒हिणी॑ वे॒तु प॒त्नी । वि॒श्वरू॑पा बृ॒हती॑ चि॒त्रभा॑नुः । सा नो॑ य॒ज्ञस्य॑ सु॒विते॑
द॒धातु॑ । यथा॑ जी॒र्वेम॑ श॒रदः॑ स॒वीराः॑ । रो॒हिणी॑ दे॒व्युद॑गात्पु॒रस्तात्॑ । वि॒श्वा रू॑पाणि
प्र॒तिमो॑द॒माना । प्र॒जाप॑ति॒ग्ं ह॒विषा॑ वर्ध॒यन्ती॑ । प्रि॒या दे॒वाना॑मु॒पया॑तु॒ यज्ञ॑म् ॥ २ ॥

सोमो॑ रा॒जा मृ॑ग॒शीर्षे॑ण आ॒गन् । शि॒वं नक्ष॑त्रं प्रि॒यम॑स्य॒ धाम॑ । आ॒प्याय॑मानो बहु॒धा
जने॑षु । रे॒तः प्र॒जां य॑ज॒माने॑ द॒धातु॑ । यत्ते॑ नक्ष॒त्रं मृ॑ग॒शीर्ष॑मस्ति । प्रि॒यं रा॑ज॒न्
प्रि॒यत॑मं प्रि॒याणा॑म् । तस्मै॑ ते सोम॒ ह॒विषा॑ वि॒धेम॑ । श॒न्न ए॒धि द्वि॒पदे॑ शं च॒तुष्प॑दे ॥ ३
॥

आ॒र्द्रया॑ रु॒द्रः प्र॑थ॒मा न ए॑ति । श्रे॒ष्ठो दे॒वानां॑ प॒तिर॑घ्नियाना॑म् । नक्ष॑त्रम॒स्य ह॒विषा॑ वि॒धेम
। मा नः॑ प्र॒जाग्ं री॑रिष॒न्मोत॑ वी॒रान् । हे॒ती रु॒द्रस्य॑ प॒रिणो॑ वृणक्तु । आ॒र्द्रा नक्ष॑त्रं
जुष॑ताग्ं ह॒विर्नः॑ । प्र॒मुञ्च॑मानौ दु॒रितानि॑ वि॒श्वा । अ॒पाघ॑श॒ग्ंसं नु॑दता॒मरा॑तिम् ॥ ४ ॥

पुन॑र्नो॒ देव॑दितिः स्पृ॒णोतु॑ । पुन॑र्वसू॒ नः पुन॑रेतां॒ य॒ज्ञम् । पुन॑र्नो॒ देवा॑ अ॒भिय॑न्तु॒ सर्वे॑ ॥
पुनः॑ पुन॑र्वो॒ हविषा॑ यजामः । ए॒वा न॑ दे॒व्यदि॑तिरन॒र्वा । विश्व॑स्य॒ भर्त्री॑ जग॒तः प्रति॑ष्ठा ।
पुन॑र्वसू॒ हविषा॑ वर्ध॑यन्ती । प्रि॒यं दे॒वाना॑मप्येतु॒ पाथः॑ ॥ ५ ॥

बृ॒हस्प॑तिः प्रथ॒मं जा॑यमानः । ति॒ष्यं न॑क्ष॒त्रम॒भि संब॑भूव । श्रेष्ठो॑ दे॒वानां॑ पृ॒तना॑सु
जिष्णुः॑ । दि॒शोऽनु॑ सर्वा॒ अभ॑यं नो अस्तु । ति॒ष्यः पु॒रस्ता॑दु॒त म॑ध्यतो नः ।
बृ॒हस्प॑तिर्नः॒ परि॑पातु॒ पश्चात् । बा॑धेतां॒ द्वेषो॑ अभ॑यं कृ॒णुता॑म् । सु॒वीर्य॑स्य॒ पत॑यः स्याम
॥ ६ ॥

इ॒दं स॑र्पे॒भ्यो ह॑वि॒रस्तु॑ जुष्टम् । आ॒श्रेषा॑ ये॒षाम॑नु॒यन्ति॑ चेतः । ये अ॒न्तरि॑क्षं पृथि॒वीं
क्षि॑यन्ति । ते नः॑ सर्पा॒सो ह॑व॒माग॑मिष्ठाः । ये रो॑चने॒ सूर्य॑स्यापि॒ सर्पाः॑ । ये दि॒वं
दे॒वीम॑नु॒ संच॑रन्ति । ये॒षामा॑श्रेषा॒ अनु॑यन्ति॒ काम॑म् । ते॒भ्यः स॑र्पे॒भ्यो म॑धु॒मज्जु॑होमि ॥
७ ॥

उ॒प॒हू॒ताः पि॒तरो॑ ये म॒घासु॑ । म॒नोज॑वसः सु॒कृतः॑ सु॒कृत्याः॑ । ते नो॑ नक्ष॒त्रे
ह॑व॒माग॑मिष्ठाः । स्व॒धाभि॑र्य॒ज्ञं प्र॑यतं जुषन्ताम् । ये अ॒ग्नि॑दग्धा॒ येऽन॑ग्निदग्धाः ।
येऽमु॒ल्लो॒कं पि॒तरः॑ क्षि॒यन्ति॑ । याग्श्च॑ वि॒द्मया॑ग्ं उ॒ च न॑ प्रवि॒द्म । म॒घासु॑ य॒ज्ञं
सु॒कृतं॑ जुषन्ताम् ॥ ८ ॥

गवां॑ पतिः॑ फल्गु॑नीनामसि॑ त्वम् । तद॑र्यमन् वरुण॑मित्र चारु॑ । तं त्वा॑ वयग्ं॑ सनितार॑ग्ं
सनीनाम् । जी॒वा जी॒वन्तमु॑प संवि॑शेम । येने॑मा विश्वा॑ भुवनानि॑ संजिता । यस्य॑ दे॒वा
अनु॑ सं॒यन्ति॑ चेतः । अ॒र्यमा॑ राजाऽज॒रस्तु॑ विष्मान् । फल्गु॑नीनामृष॑भो रो॒रवीति॑ ॥ ९ ॥

श्रेष्ठो॑ दे॒वानां॑ भगवो॑ भगासि । तत्त्वा॑ विदुः॑ फल्गु॑नीस्तस्य॑ वित्तात् । अस्मभ्यं॑
क्षत्र॑मजर॑ग्ं सु॒वीर्य॑म् । गोम॑दश्च॒वदु॑प सन्नु॑देह । भगो॑ ह दा॒ता भग॑ इत्प्रदा॒ता । भगो॑
दे॒वीः फल्गु॑नीरा॒विवेश॑ । भग॑स्येत्तं प्र॒सवं॑ गमे॑म । यत्र॑ दे॒वैः स॒धमादं॑ मदे॑म ॥ १० ॥

आया॑तु दे॒वः स॒वितो॑पयातु । हि॒रण्यये॑न सु॒वृता॑ रथे॑न । वहन्, ह॒स्तग्ं॑ सु॒भग्ं
वि॒द्वना॑पसम् । प्र॒यच्छ॑न्तं प॒पुरिं॑ पु॒ण्यम॑च्छ । ह॒स्तः प्र॒यच्छ॑ त्वमृ॒तं व॑सीयः । दक्षि॑णेन
प्रति॑गृ॒ष्णीम॑ ए॒नत् । दा॒तार॑मद्य॒ सवि॑ता वि॒देय॑ । यो नो॑ ह॒स्ताय॑ प्र॒सुवा॑ति॒ यज्ञ॑म् ॥ ११
॥

त्वष्टा॑ नक्ष॒त्रम॑भ्येति॒ चित्रा॑म् । सु॒भग्ं स॑संयु॒वति॑ग्ं रोच॑मानाम् ।
नि॒वेश॑यन्नमृ॒तान्मर्त्या॑ग्ंश्च । रू॒पाणि॑ पि॒ग्ंशन्॑ भुवनानि॑ विश्वा॑ । तन्न॑स्त्वष्टा॒ तदु॑ चि॒त्रा
वि॒चष्टा॑म् । तन्नक्ष॑त्रं भूरि॒दा अस्तु॑ मह्य॑म् । तन्नः॑ प्र॒जां वी॑रवती॒ग्ं स॑नोतु । गोभि॑र्नो
अश्वैः॑ स॒मन॑क्तु॒ यज्ञ॑म् ॥ १२ ॥

वा॒युर्नक्ष॑त्रम॒भ्येति॑ नि॒ष्ट्याम् ॥ ति॒ग्मशृ॑ंगो वृष॒भो रो॑रुवाणः । स॒मी॒र्यन् भु॑वना मा॒तरि॒श्वा ॥
। अप॑ द्वेषा॒गंसि॑ नुदतामरातीः । तन्नो॑ वा॒युस्तदु॑ नि॒ष्ट्या श्रु॑णोतु । तन्नक्ष॑त्रं भूरि॒दा अस्तु॑
म॒ह्यम् ॥ तन्नो॑ दे॒वासो॑ अनु॒जानन्तु॑ का॒मम् । यथा॑ तरे॒म दु॑रितानि वि॒श्वा ॥ १३ ॥

दूर॑म॒स्मच्छ॑त्रवो यन्तु भी॒ताः । तदिन्द्रा॑ग्नी कृ॒णुतां॑ तद्विशा॒खे । तन्नो॑ दे॒वा अनु॑मदन्तु
य॒ज्ञम् । प॒श्चात् पु॒रस्ता॑दभयन्नो अस्तु । नक्ष॑त्राणामधिप॒त्नी वि॒शा॒खे । श्रेष्ठा॑विन्द्रा॒ग्नी
भु॒वन॑स्य गो॒पौ । वि॒षूचः॑ शत्रू॒नप॒बाध॑मानौ । अप॑ क्षु॒धं नु॑दतामरातिम् ॥ १४ ॥

पूर्णा॑ पश्चा॒दुत॑ पूर्णा॒ पु॒रस्ता॑त् । उ॒न्मध्य॑तः पौ॒र्णमा॑सी जिगाय । तस्या॑ दे॒वा अधि॑
सं॒वस॑न्तः । उ॒त्तमे॑ नाक॒ इह॑ मा॒दय॑न्ताम् । पृ॒थ्वी सु॒वर्चा॑ यु॒वतिः॑ स॒जोषाः॑ ॥
पौ॒र्णमा॑स्यु॒दगा॑च्छो॒भमाना॑ । आ॒प्याय॑यन्ती दु॒रितानि॑ वि॒श्वा ॥ उ॒रु दु॒हां य॑जमानाय य॒ज्ञम्
॥ १५ ॥

ऋ॒ध्यास्मि॑ ह॒व्यैर्न॑मसोपसद्य । मि॒त्रं दे॒वं मि॒त्रधे॑यं नो अस्तु । अ॒नू॒रा॒धान् ह॒विषा॑
व॒र्धय॑न्तः । श॒तं जी॑वेम श॒रदः॑ स॒वीराः॑ । चि॒त्रं नक्ष॑त्रमु॒दगा॑त्पु॒रस्ता॑त् । अ॒नू॒रा॒धास॑ इति
यद्व॑दन्ति । तन्मि॒त्र ए॒ति प॒थिभि॑र्दे॒वयानैः॑ ॥ हि॒रण्य॑यै-र्वि॒ततै॑-रन्त॒रिक्षे॑ ॥ १६ ॥

इन्द्रो॑ ज्येष्ठा॒मनु॑ नक्ष॑त्रमेति । यस्मिन् वृ॒त्रं वृ॒त्र तूर्ये॑ ततार । तस्मि॑न्वय-म॒मृतं॑ दु॒हानाः॑ ।
क्षु॒धन्तरे॑म दु॒रितिं॑ दु॒रिष्टि॑म् । पु॒रन्द॒राय॑ वृष॒भाय॑ धृ॒ष्णवे॑ ॥ अ॒षाढा॑य स॒हमा॑नाय मी॒ढुषे॑ ॥
इन्द्रा॑य ज्येष्ठा मधु॒मदु॑हाना । ऊ॒रुं कृ॑णोतु यज॒मानाय॑ लो॒कम् ॥ १७ ॥

मूलं प्रजां वीरवतीं विदेय । पराच्येतु निर्ऋतिः पराचा । गोभिर्नक्षत्रं पशुभिः समक्तम् ।
अहर्भूयाद्यजमानाय मह्यम् । अहर्नो अद्य सुविते दधातु । मूलं नक्षत्रमिति यद्वदन्ति ।
पराचीं वाचा निर्ऋतिं नुदामि । शिवं प्रजायै शिवमस्तु मह्यम् ॥ १८ ॥

या दिव्या आपः पयसा सम्बभूवुः । या अन्तरिक्ष उत पार्थिवीर्याः । यासां-मषाढा
अनुयन्ति कामम् । ता न आपः शग्ग् स्योना भवन्तु । याश्च कूप्या याश्च
नाद्यास्समुद्रियाः । याश्च वैशन्तीरुत प्रासचीर्याः । यासामषाढा मधु भक्षयन्ति । ता न
आपः शग्ग् स्योना भवन्तु ॥ १९ ॥

तन्नो विश्वे उप श्रुण्वन्तु देवाः । तदषाढा अभिसंयन्तु यज्ञम् । तन्नक्षत्रं प्रथतां
पशुभ्यः । कृषिर्वृष्टि-र्यजमानाय कल्पताम् । शुभ्राः कन्या युवतयः सुपेशसः ।
कर्मकृतः सुकृतो वीर्यावतीः । विश्वान् देवान्, हविषा वर्धयन्तीः । अषाढाः
काममुपयान्तु यज्ञम् ॥ २० ॥

यस्मिन् ब्रह्माभ्यजयत्सर्वमेतत् । अमुञ्च लोक-मिदमूच सर्वम् । तन्नो नक्षत्र-
मभिजिद्विजित्य । श्रियं दधात्वहृणीयमानम् । उभौ लोकौ ब्रह्मणा सञ्जितेमौ । तन्नो
नक्षत्रमभिजिद्विचष्टाम् । तस्मिन्वयं पृतनाः संजयेम । तन्नो देवासो अनुजानन्तु कामम्
॥ २१ ॥

श्रु॒ण्वन्ति॑ श्रो॒णा-म॒मृत॑स्य गो॒पाम् । पु॒ण्याम॑स्या उप॒श्रुणो॑मि वाच॒म् ॥ म॒हीं दे॒वीं
वि॒ष्णु॑पत्नी-म॒जूर्या॑म् । प्र॒तीची॑ मे॒नाग्ं ह॒विषा॑ य॒जामः॑ । त्रे॒धा वि॒ष्णु-रु॒रुगा॑यो वि॒च॒क्रमे॑
। म॒हीं दि॒वं पृ॒थि॒वी-म॒न्तरि॑क्षम् । तच्छ्रो॒णैति॑ श्रव॒-इच्छ॑माना । पु॒ण्यग्ं॒ श्लोकं॑
य॒जमा॑नाय कृ॒ण्वती॑ ॥ २२ ॥

अ॒ष्टौ दे॒वा व॑सवः सो॒म्यासः॑ । च॒तस्त्रो॑ दे॒वी-र॒जराः॑ श्र॒विष्ठाः॑ । ते य॒ज्ञं पा॑न्तु र॒जसः॑
प॒रस्ता॑त् । सं॒वत्स॑रीण-म॒मृत॑ग्ं स्व॒स्ति । य॒ज्ञं नः॑ पा॑न्तु व॒सवः॑ पु॒रस्ता॑त् ।
द॒क्षिण॑तोऽभियन्तु श्र॒विष्ठाः॑ । पु॒ण्यन्न॑क्ष॒त्रम॑भि संवि॒शाम॑ । मा नो॒ अरा॑ति-
र॒घश॑ग्ंसाऽग॒न् ॥ २३ ॥

क्ष॒त्रस्य॑ रा॒जा व॑रु॒णोऽधि॑राजः । न॒क्षत्रा॑णाग्ं श॒तभि॑ष॒ग्वसि॑ष्ठः । तौ दे॒वेभ्यः॑ कृ॒णुतो॑
दी॒र्घमा॑युः । श॒तग्ं स॒हस्त्रा॑ भेष॒जानि॑ धत्तः । य॒ज्ञन्नो॑ रा॒जा व॑रु॒ण उप॑यातु । तन्नो॑ वि॒श्वे
अ॒भि सं॑यन्तु दे॒वाः । तन्नो॑ न॒क्षत्र॑ग्ं श॒तभि॑ष॒ग्वजु॑षाणम् । दी॒र्घमा॑युः प्र॒तिर॑द्ब्रेष॒जानि॑ ॥
२४ ॥

अ॒ज एक॑पा॒दुद॑गात्पु॒रस्ता॑त् । वि॒श्वा भू॑तानि प्र॒तिमो॑द॒मानः॑ । तस्य॑ दे॒वाः प्र॑स॒वं य॑न्ति
सर्वे॑ । प्रो॒ष्ठप॑दासो अ॒मृत॑स्य गो॒पाः । वि॒भ्राज॑मानः स॒मिधान॑ उ॒ग्रः ।
आऽन्तरि॑क्षम॒रुह॑द॒गन्ध्या॑म् । तग्ं सूर्य॑ दे॒व-म॒जमे॑कपा॒दम् । प्रो॒ष्ठप॑दासो अनु॒यन्ति॑ सर्वे॑
॥ २५ ॥

अहिर्बुध्नियः प्रथमा न एति । श्रेष्ठो देवानामुत मानुषाणाम् । तं ब्राह्मणाः सोमपाः
सोम्यासः । प्रोष्ठपदासो अभिरक्षन्ति सर्वे । चत्वार एकमभि कर्म देवाः । प्रोष्ठपदा स
इति यान्, वदन्ति । ते बुध्नियं परिषद्यग्ग् स्तुवन्तः । अहिग्ग् रक्षन्ति नमसोपसद्य ॥
२६ ॥

पूषा रेवत्यन्वेति पन्थाम् । पुष्टिपती पशुपा वाजबस्त्यौ । इमानि हव्या प्रयता जुषाणा ।
सुगैर्नो यानैरुपयातां यज्ञम् । क्षुद्रान् पशून् रक्षतु रेवती नः । गावो नो अश्वाग्ग् अन्वेतु
पूषा । अन्नग्ग् रक्षन्तौ बहुधा विरूपम् । वाजग्ग् सनुतां यजमानाय यज्ञम् ॥ २७ ॥

तदश्विनावश्वयुजोपयाताम् । शुभं गमिष्ठौ सुयमेभिरश्वैः । स्वं नक्षत्रग्ग् हविषा यजन्तौ ।
मध्वा संपृक्तौ यजुषा समक्तौ । यौ देवानां भिषजौ हव्यवाहौ । विश्वस्य दूता-वमृतस्य
गोपौ । तौ नक्षत्रं जुजुषाणोपयाताम् । नमोऽश्विभ्यां कृणुमोऽश्वयुग्ग्भ्याम् ॥ २८ ॥

अप पाप्मानं भरणीर्भरन्तु । तद्यमो राजा भगवान्, विचष्टाम् । लोकस्य राजा महतो
महान्, हि । सुगं नः पन्थामभयं कृणोतु । यस्मिन्नक्षत्रे यम एति राजा । यस्मिन्नेन-
मभ्यषिञ्चन्त देवाः । तदस्य चित्रग्ग् हविषा यजाम । अप पाप्मानं भरणीर्भरन्तु ॥ २९
॥

निवेशनी॑ सङ्गमनी॑ वसूनां॑ विश्वा॑ रूपाणि॑ वसू॑न्यावेशयन्ती॑ । सहस्र॑-पोष॑गं सु॒भगा॑
र॒राणा॑ सा न आ॒गन्वर्च॑सा संवि॒दाना॑ । यत्ते॑ दे॒वा अ॒दधु॑र्भा॒गधे॒यम॒मावा॑स्ये स॒वस॑न्तो
म॒हित्वा॑ । सा नो॑ य॒ज्ञं पि॒पृहि॑ विश्व॒वारे॑ र॒यिन्नो॑ धेहि सु॒भगे॑ सु॒वीर॑म् ॥ ३० ॥

ॐ शान्तिः॑ शान्तिः॑ शान्तिः॑ ॥